

Atortut innaallagiartortut isumannaatsuunissaat pillugu Namminersorlutik Oqartussat nalunaarutaat

§ 6, imm 1 naapertorlugu Sanaartukkat innaallagissamut atugassat, innaallagissamut ikkussuinerit aamma atortut innaallagiartortut pillugit Inatsisartut peqqussutaat nr. 12, 3. november 1994-imeersumi, Inatsisartut inatsisaanni nr. 19, 12. juni 2019-imeersumi allanngortinneqartumi, Innaallagissiornermut Oqartussanit aalajangersaneqassaaq:

Kapitali 1

Atuuffia il.il.

§ 1. Nalunaarut una makkununga atuuppoq:

- 1) Atortussianut innaallagiartortunut sarfamut aalajangersimasumik sakkortussusilimmut vekselstrømimi 50 V aamma jævnstrømimi 75 V inorlugit sarfaqartunut atorineqartussatut naatsorsuutigineqartunut.
- 2) Atortussianut innaallagiartortunut sarfamut aalajangersimasumik sakkortussusilimmut vekselstrømimi 1000 V aamma jævnstrømimi 1500 V qaangerlugit sarfaqartunut atorineqartussatut naatsorsuutigineqartunut.
- 3) Innaallagissamut uuttuutit, ungaluni innaallagialinnut sarfalersuutitut aammattaaq iikkami ikkuffinnut ikkuttakkanut aamma ikkuffinnut iikkamiittunut illup iluani assigisaannilu atorineqartussanut, tassani apeqqutaanngilaq normu 1-2-mi sarfamut killissarititaasumut ilaanersut.

§ 2. Atortussiat innaallagiartortut naalagaaffimmi EU-mut ilaasortaasumi imaluunniit Tyrkiami nioqqutissiarineqartut imaluunniit nioqqutinngortinneqartut, imaluunniit naalagaaffimmi EFTA-mut ilaasortaasumi inatsisit malillugit nioqqutissiarineqartut inatsisit unioqqutinnagit aamma killilersuutitaqanngitsumit Kalaallit Nunaannut eqqunneqarsinnaapput atorineqarsinnaallutillu, taakkua isumannaallisaanermut piumasaqaatit nalinginnaasut nalunaarummi matumaniittunut assingusut eqqortippatigit.

Kapitali 2

Inatsisartut peqqussutaani isumannaallisaanermut piumasaqaammik eqqortitsineq

§ 3. Inatsisartut peqqussutaani § 5, imm. 2-mi isumannaallisaanermut piumasaqaat, tak. nalunaarummi matumani §§ 4-mit 12-mut eqqortinneqartutut isigineqarput, atortussiat innaallagiartortut Dansk Standard-imit (DS) tamanut saqqummiunneqarsimasut, atortussianut innaallagiartortunut isumannaallisaanermut tunngasut nalinginnaasut malillugit nioqqutissiarineqarsimappata.

Imm. 2. Isumannaallisaanermut nalinginnaasut taamatut ittut pigineqanngippata, soorlu imm. 1-imi taaneqartut, taava isumannaallisaanermut piumasaqaat Inatsisartut peqqussutaani § 5, imm. 2-mi, tak. nalunaarummi matumani §§ 4-mit 12-mut eqqortinneqartutut isigineqarpoq, atortussiaq innaallagiartortoq Den Europæiske Komité for Elektroteknisk Standardisering-imit (CENELEC) tamanut saqqummiunneqarsimasut, atortussianut innaallagiartortunut Europami isumannaallisaanermut tunngasut nalinginnaasut malillugit nioqqutissiarineqarsimappata.

Imm. 3. Isumannaallisaanermut nalinginnaasut taamatut ittut pigineqanngippata, soorlu imm. 1-2-mi taaneqartut, taava isumannaallisaanermut piumasaqaat Inatsisartut peqqussutaani § 5, imm. 2-mi, tak. nalunaarummi matumani §§ 4-mit 12-mut eqqortinneqartutut isigineqarpoq, atortussiaq innaallagiartortoq Den Internationale Elektrotekniske Kommission-imit (IEC) tamanut saqqummiunneqarsimasut, atortussianut innaallagiartortunut nunani tamalaani isumannaallisaanermut tunngasut nalinginnaasut malillugit nioqqutissiarineqarsimappata.

Imm. 4. Nalinginnaasut atorneqartut imm. 1-3 naapertorlugit atortussiami innaallagiartortumi isumannaallisaanermut nalorninartuusinnaasunut paasineqarsimasunut tamanut tunngasuuteqassapput.

Imm. 5. Nalinginnaasut pineqartut atorneqanngippata imaluunniit taakkua ilaannaat atorneqarpata taava uppersaaserneqassaaq, Inatsisartut peqqussutaani § 5, imm. 2 naapertorlugu isumannaallisaanermut piumasaqaatip eqqortinneqarnera, tak. § 16, imm. 2.

Kapitali 3

Isumannaallisaanermut piumasaqaatit ataatsimoortut

Piumasaqaatit nalinginnaasut

§ 4. Atortussiaq innaallagiartortoq aamma taassuma ilaat ataasiakkaat imatut suliarineqassapput, isumannaatsumik aamma illersorneqarsinnaasumik ikkunneqarsinnaallutillu atorneqarsinnaassallutik.

§ 5. Atortussiaq innaallagiartortoq imatut ilusilersorneqassaaq aamma sananeqassaaq inuit, uumasuutit aamma pigisat navianarsinnaasunut, §§ 6-12-imut taaneqartunut, illersorneqarnissaat qulakkeerlugu tassa atortussiap innaallagiartortup piunera tamakkerlugu tassani apeqqutaavoq siumut takorloorneqarsinnaasut tunngavigalugit atorneqarnera.

Navianarsinnaasunut atortussiamit innaallagiartortumit pilersinnaasunut illersorneqarneq

§ 6. Inuit aamma uumasuutit navianartunut illersorneqassapput timimikkut ajoqusernissaannut imaluunniit allatut ajoqusernissaannut, toqqaannartumik imaluunniit toqqaannangitsumit atuinermit pilersinneqarsinnaasunut.

§ 7. Kissattoorneq, innaallattoorneq imaluunniit qinngornerit pilersinnaanerat pinngitsoortinneqassapput, tamakku inunnut, uumasuutitut imaluunniit pigisanut navianartorsiortitseqqunagit.

§ 8. Inuit, uumasuutit imaluunniit pigisat innaallagiartortuunngitsunut illersorneqassapput, atortussianit innaallagiartortunit attuumassuteqarsinnaasunut.

§ 9. Tapinnaallisaaneq sunniutaasinnaasunut siumut takorloorneqarsinnaasunut naleqqussarneqassaaq.

Navianartunut illersuusiineq atortussiamut innaallagiartortumut avataanit sunnerneqartumit pilersinnaasunut

§ 10. Atortussiaq innaallagiartortoq siumut takorloorneqarsinnaasut tunngavigalugit atorneqarnermini sunniutaasunut mekaniskiusunut sunnerneqarneq akiorsinnaassavaa, taamaalilluni inuit, uumasuutit imaluunniit pigisat navianartorsiortinneqassanatik.

§ 11. Atortussiaq innaallagiartortoq siumut takorloorneqarsinnaasut tunngavigalugit atorneqarnermini sunniutaasunut mekaniskiusunut avatangiisinniittuni sunnerneqarneq akiorsinnaassavaa, taamaalilluni inuit, uumasuutit imaluunniit pigisat navianartorsiortinneqassanatik.

§ 12. Atortussiamit innaallagiartortumit inuit, uumasuutit imaluunniit pigisat sakkortuumik sarfanittoornermut siumut takorloorneqarsinnaasunut navianartorsiortinneqassanngillat.

Kapitali 4

Immikkut isumannaallisaanermut il.il. piumasaqaatit

§ 13. Innaallagissap aqqutaanut ikkuttakkat aamma innaallagissamut ikkuffiit iikkamiittut illumi atortussaniittut assigisaasalu DS 60884-2-D1-imi "Stikpropper og stikkontakter til husholdningsbrug o.l." atuuttuusut eqqortissavai, tassaasut Danmarkimi atortunut aalajangersakkat.

§ 14. Napparsimavinni innaallagissap aqqutaanut ikkuttakkat DS 60884-2-D1-imi, "Stikpropper og stikkontakter til husholdningsbrug o.l." atuuttuusut eqqortissavai, tassaasut Danmarkimi atortunut aalajangersakkat, normblad DK 2-8a, aamma napparsimavinni innaallagissap aqqutaanut ikkuttakkat DS 60884-2-D1-imi, "Stikpropper og stikkontakter til husholdningsbrug o.l." atuuttuusut eqqortissavai, tassaasut Danmarkimi atortunut aalajangersakkat, normblad DK 1-8a imaluunniit DK 1-8b.

Imm. 2. Napparsimavinni innaallagissap aqqutaanut ikkuttakkat, taamaallaat atortussiani innaallagiartortuni napparsimavinni aamma sumiiffinni assingusuni innaallagissap aqqutaani atorneqaqqusaapput.

§ 15. Nalinginnaasut najoqqutassami matumani innersuunneqartut, Dansk Standard aqqutigalugu pisiarineqarsinnaapput imaluunniit Innaallagissiornermut Oqartussani misissorneqarsinnaapput.

Kapitali 5

Uppernarsaasersuineq

§ 16. Atortussiamik innaallagiartortumik sanasoq aamma kinaluunniit atortussiamik innaallagiartortumik Kalaallit Nunaannut eqqussuisoq, Inatsisartut peqqussutaanni § 5, imm. 2-mik eqqortitsinerminut uppersaasarsuutitut qulakkiissavaa, matumani tulliuttut Innaallagissiornermut Oqartussaasunit pissarsiarineqarsinnaanerit:

- 1) Atortussiamik innaallagiartortumik kina sanasuusimanersoq pillugu paasissutissat. Atortussiaq innaallagiartortuq pillugu nassuiaassut tassani paatsuugassaanngitsumik taanna suussusersineqassaaq, allanneqassallutik suunera, nioqutissiarineqarnermini normua, serienormua imaluunniit assigisaa.
- 2) Atortussiaq innaallagiartortuq pillugu ataatsimoortumik allaaserinninneq.
- 3) Misilarneqarnerani nalunaarutit.
- 4) Navianartoqarsinnaaneranut nalilersuineq tassani allaaserineqarlutik atortussiap innaallagiartortup uninngatinneqarnerani, assartorneqarnerani, ikkunneqarnerani, atorneqalernersani aamma ingerlatinneqarnerani navianartut suut pilersinnaasut, tassa taanna aalajangersakkat aamma siumut takorloorneqarsinnaasut tunngavigalugu atorneqarpat, aammattaaq qanoq kapitali 3-4-mut isumannaallisaanermut piumasaqaatit eqqortinneqarnissaat qanoq qulakkeerneqarsimanersut, taamaallilluni atortussiaq innaallagiartortuq piusinnaanini tamakkerlugu isumannaatsuussammat.

Imm. 2. Atortussiamut innaallagiartortumut isumannaallisaanermut maleruaqqusat nalinginnaasut atorneqanngippata, tak. § 3, imm. 1-3-mut imaluunniit taakkua taamaallaat ilaannakortumik atorneqarlutik, taava kialuunniit atortussiamik innaallagiartortumik sanasup aamma kinaluunniit atortussiamik innaallagiartortumik Kalaallit Nunaannut eqqussuisoq, imm. 1-imi imarisaasut saniatigut qulakkiissavaa, uppersaasarsuutitut matumani tulliuttut Innaallagissiornermut Oqartussaasunit pissarsiarineqarsinnaanerit:

- 1) Sananeqarnerani aamma nioqutissiarineqarnerani titartakkat, atortuisa allattorsimaffiat aamma innaallagissap ingerlaarneranut titartakkat.
- 2) Allaaserinninnerit aamma nassuiaatit, tassa imm. 2, normu 1 naapertorlugu uppersaasarsuummik paasinninnissamut pisariaqartut.
- 3) Aaqqiissutissat pillugit allaaserinninnerit isumannaallisaanermut piumasaqaatit ataatsimoortut, tak. kapitali 3, eqqortinneqarnissaat pillugu toqqarneqarsimasut.

Imm. 3. Uppersaasarsuut imm. 1-2 naapertorlugu Innaallagissiornermut Oqartussanut atorneqartussanngortinneqarsinnaassappat ukiut qulit qaangiunneranni, tassa atortussiap innaallagiartortup Kalaallit Nunaannut eqqunneqarneranit, imaluunniit niuerutigalugu aallartinneqarneranit.

Imm. 4. Innaallagissiornermut Oqartussaasut piffissamik naammaginatut aalajangersaasinnaavoq imm. 1-2 naapertorlugit uppersaasarsuutit nassiussisoqarnissaanut. Uppersaasarsuut kalaallit, danskit imaluunniit tuluit oqaasii atorlugit saqqummiunneqassaaq.

Kapitali 6

Pineqaatissiissutit

§ 17. Pillaammik akiliisinneqarsinnaavoq imatut iliortoq

- 1) isumannaallisaanermut piumasaqaatinik ataatsimoortunik §§ 4-12-imiittunik unioqqutitsisoq,
- 2) immikkut isumannaallisaanermut piumasaqaatinik §§ 13-14-imiittunik unioqqutitsisoq, imaluunniit
- 3) uppersaasarsuutit § 16 naapertorlugu piumasaqaataasunik saqqummiussinngitsisoq.

Imm. 2. Inuit inatsisitigut pisinnaatitaasut pisussaatitaasullu akiliisussanngortinneqarsinnaapput Kalaallit Nunaanni pinerluttulerinermi Inatsimmi maleruaqqusat naapertorlugit.

Imm. 3. Pillaammik akiliisitsinerit nalunaarut naapertorlugu pineqaatissiissutaasut Nunatta Karsianut nakkartinneqassapput.

Kapitali 7

Atuutilersitsineq

§ 18. Nalunaarut atuutilerpoq 1. januaari 2020.

Innaallagissiornermut Oqartussat, ulloq 12. december 2019

Michael Petersen

/

Jane Lynge Hansen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut